

# Ina fasa impurtanta

Questa primavaira decidan differentas scolas davart l'introducziun dal rumantsch grischun en scola

DAD ERWIN CADUFF

■ **Emnas decisivas stattan avant porta per l'introducziun dal rumantsch grischun en scola. Pliras vischnancas ubain consorzis da scola decidan proximamain sch'ins vul entschaver l'onn 2007/08 activamain cun l'introducziun dal rg en scola.** La Val Müstair è stada la piuniera. Gia l'onn passà èn tuttas vischnancas da la Val Müstair sa decididas per la varianta piunier. Ina cundiziun avevan ils Jauers dentant fatg: Almain in'otra scola en in'otra regiun stoppia medemamain sa decider per quella varianta per ch'els na stettian betg qua isolads. Quella premissa pudess esser dada gia venderdi proxim. La vischnanca da Lantsch ha gia decidì cleramain (58:1 vuschs) per la varianta da piunier. Brinzauls che fa part dal medem consorzi da scola decida ils 31 da mars. Dischan lezs medemamain gea, pon ins entschaver tant a Lantsch/Brinzauls sco er en la Val Müstair il 2007/2008 cun rumantsch grischun en scola. Era Sur (19:6) e Mon (14:1) èn gia s'exprimids en favur da la varianta piunier. Lezzas vischnancas fan dentant part dad auters consorzis da scola. En il decurs da questa primavaira decidan tut las vischnancas rumantschas dal Surses e da la Val Alvra en chaussa.

## 2000 enfin 3000 francs per scolar

Ivo Berther, incumbensà per dumondas da linguatg dal chantun, na vul betg prevegnir a las decisiuns da las vischnancas, ha dentant motivs dad esser optimist. «Las vischnancas che han gia prendì las decisiuns han fatg quai a moda persavanta e clera. Tar tut las vischnancas che decidan proximamain è il prim pass vegnì da la vischnanca anor. Adina lezza che ha tschertgà il contact cun il chantun e na betg il cuntrari. L'interess è pia qua.»



L'incumbensà dal chantun per dumondas da linguatg, Ivo Berther, è optimist ch'ins possa cumenzar l'onn proxim en differentas scolas dal Grischun cun il rg en scola.

FOTO E. CADUFF

Quel interess vegn er anc promovì cun in bel zutger. Vischnancas ubain consorzis che sa decidan per la varianta piunier, pia entschaver activamain cun rumantsch grischun en scola, survegnan per mintga scolar 2000 enfin 3000 francs e quai sur quatter onns. Ina contribuziun considerabla che gida a schliar problems finanziaus.

Da dir èsi dentant ch'i na basta betg da sa decider l'auter onn il favrer per la varianta piunier e gia vulair entschaver l'avust 2007 cun il rumantsch grischun en scola. «Tgi che vul entschaver il 2007 sto decider avant las vacanzas da stad

2006. Quel temp dovre simplamain per la furmazion da la magistraglia» di Ivo Berther.

Cun la varianta piunier pon ins entschaver enfin l'onn da scola 2010/11. Il 2011/12 vegn introduzì la varianta standard. Era per quella datti probabel anc ina remuneraziun, en tge autezza n'ha Berther anc betg pudì tradir.

Tgi che vul anc star tar ils idioms e guardar co la chaussa sa sviluppescha po era far quai. «Nus essan en ina situaziun confortabla», di Berther. «Ils meds d'instrucziun actuals èn buns e garanteschans la qualitad da la scola anc per ina genera-

ziun. Il pli tard l'onn 2015/16 èn quels meds dentant antiquads e lura vegn la varianta «consolidaziun» en vigur. Per lezza na dat quai nagin sustegn finanziau dal chantun.

## Trin decida ils 11 d'avrigl

En Surselva han las scolas da Laax/Falera signalisà interess per il model piunier. Ivo Berther ha er orientà là las autoritads politicas, ils cussegls da scola e las persunas d'instrucziun davart il concept. Quant madir ch'il project è n'ha el dentant betg pudì dir. Il president dal cussegl da scola da Laax, Arnold Catho-

mas, ha confermà ch'ins veglia orientar proximamain la populaziun. Sche la decisiun vegnia anc prendida questa primavaira ubain pir l'auter onn n'ha el betg pudì dir.

Pli avanzà è il project rumantsch grischun en scola a Trin. Là decida il suveran ils 11 d'avrigl a chaschun da la radunanza communal davart l'introducziun dal rumantsch grischun en scola. L'iniziativa è vegnida da sutensi, numnadamain da la magistraglia. Da lezza è il giavisch i tar il cussegl da scola che ha preschentà la proposta a la suprastanza communal. La suprastanza la fin finala ha spluntà tar il chantun e signalisà la prontezza per il project piunier. En il messadi per la radunanza communal da mardi, ils 11 d'avrigl recumonda quella cler e net d'approbar l'introducziun dal rumantsch grischun en scola per l'entschatta 2007/08.

Hans Telli, president communal da Trin, di: «Primo essan nus persvadids da la chaussa. Secundo vegn il rumantsch grischun baud u tard uschia ni uschia. Pia fa quai senn dad esser gia da l'entschatta da la partida ch'ins haja gia fatg quest pass cura ch'auters problems sa tschentent. Terzo ha era l'aspect finanziau giugà ina rolla.» E Telli concluda: «I vegn prest discursi 30 onns sur da quest rumantsch grischun. Uss èsi uras da far in pass enavant.»

Ina constataziun che vegn a plaschair ad Ivo Berther. Per lez sa sviluppescha l'entir project a moda plaschavla. «Sche nus avain vischnancas ord fermes territoris rumantschs, flaiVELS territoris rumantschs e vischnancas bilinguas che fan l'emprim pass, lura avain nus suenter tut ils pli differentes models. Ad autras vischnancas che ston sa decider levgiescha quai la decisiun, damai ch'ins po mussar co i funcziuna en auters lieus cun structurass sumegliantass.»